

摘藻堂四庫全書薈要

集部

欽定四庫全書薈要

集部

石田詩選卷七



欽定四庫全書薈要卷一萬六千八百十三

集部

石田詩選卷七

明 沈周 撰

贈 寄答附

贈徐遵誨和劉邦彥韻四首

祖宗原自有高勲
少小豪雄貌冠軍
竹裏行厨青玉案
酒邊官妓茜紅裙
洛陽紙貴三都出
夔府沙平八陣分
頭白歸來惟感慨
却慚多病負明君

不徒說劍與談兵況是文章動兩京
屢欲上書勤漢室時教捫舌易齊城
帆檣遠雁江開楚衾枕清猿路入荆
落落長遊半天下不知歸計幾時成

細雨春帆破曉開更添新酒事深盃
他鄉夢寐鴻于陸故國詩篇鳳有臺
白髮不歸花亦笑青山急去鳥仍催
公侯復始君須記李廣原非是死灰

斷蓬逐逐未能休搔首西風又莫秋
曲折舊袍存蜀繡蕭條空室去吳鉤
虛名落枕邯鄲夢濁酒澆胃磊砢愁

莫謂尋常種瓜者東陵曾是舊封侯

因病不預纂修之徵用呈館中諸公

纂局冠裳濟濟然白頭多病後諸賢聖功大備先皇紀
庶政分參列國編老穎何能出毛遂後堂今合讓彭宣
夜來夢秉江淹筆猶在鸞停鵠峙邊

寄沈工侍時暘

烏紗兀兀髻蒼浪物表逍遙歲月長林壑清虛流笑語
雲霞縹渺入衣裳新開玄圃長春地舊是丹丘不死鄉

還却朝廷有餘祿閒憑詩酒傲人忙

董良富舟溺有贈

君從古潤來飄風簸舟楫長年易波浪船底翻落葉君
時至濡首衣裳亦厭浥故人多附遺種種寓沉篋拆書
欲尋讀紙糜悶膠摺瓶罌作顛倒餘瀝水相浹州潤名
不祥於君有沾濕叶三日始獲見驚定語尚驚呼酒澆
惡懷累觴迨稠疊出門多畏途後進宜慎涉

謝李宗淵見訪中路有阻

斯文久矣熟芳名書到還知鄭重情風雨妬人三日惡
江湖負子一舟橫聞來無見新翻案興盡而回古有行
筋力未衰扶可拜荆溪展報已非生

戲友人尋訪不出

兩山不見雲遮眼一犬獨鳴花遶隣敢去揮毫題午字
悔將握髮望時人牆匡寂寂高槐雨門巷青青細草春
知子南還猶有興扁舟斜日弄芳蘋

喜施知州煥伯致政

乞身章上笑顏開未信吳人果自歎
孫冕怕教差致事
陶潛真要賦歸來松杉野寺膝膝杖
蔬果隣家草草杯
山水常年舊遊伴高吟清嘯有追陪

和沈文甫儀賓所寄清虛堂韻詩

湖南有洲金作沙國賓翼翼開新衙
草堂疊嶂都尉畫
名園爛錦楊妃花不矜富貴念貧賤
珠唾遠落寒翁家
白頭老拙後生鄙語言可惡還如鴉
如何泛愛使我悚
其意過借其辭葩知因宗誼漫好好
痛癢豈藉他搔爬

我家豚犬皆碌碌，懲彼不學，曾徒撾尊翁。有是子，有是
健美，不足還成嗟。天南引睇，數千里飛鳥滅，沒空雲霞。

寄夏大理李爵

鐘鼎白髮外，山林遂遲暮。任懷道屈伸，玩世雲去住。久
視天地間，百歲在跬步。文章亦壽物，垂後永無度。明州
山水佳，逍遙得真寓。清川入漁釣，高絃蔭嘉樹。可望不
可即，瞻戀存寐寤。

寄祝惟禎

容德久契濶南雲如遠人每懷依孝友獨恨失比隣
子弟詩書澤桑麻門戶春樂哉無一慮健在有雙親
恐祿未克養歸來畊有莘

贈黃撫之

相逢野寺及春殘各各蒼顏說見難歲月易流嗟物變
功名已過覺心寬梨花月枕詩通夢楊柳風杯酒起瀾
想得金陵山水地自知行樂勝爲官

薛堯卿場中卷短策長莫錄被枉黜

崢嶸老氣軼長虹，傲睨三千鵠士中。
豈爾門監知李廣，憑誰榜帖爲司空？
徘徊鵬鳳風斯下，漫衍魚龍紙易窮。
把鏡時時照鬚鬢，怕教愁雪點青銅。

寄別李知州

走幣飛箋百里情，白頭扶病亦須行。
江湖借石安鴻漸，鐘鼓當筵愧鹿鳴。
薄海春風動韋布，滿堂華月照簪纓。
扁舟莫怪從宵邁，念在庭闈告不成。

宿城西懷吟菴

水宿其如夜思何霜風拂髻影皤皤語喧盃酒商船近
人映樓臺市火多川上微波搖缺月城頭高樹掛明河
新篇在稿思君教無那無眠只漫哦

九日小酌席上贈張碧溪

人生重相知正在氣誼同蹤跡苦遼邈千里念奇逢今
日登高日有酒無菊叢有無不在物斯人吾眼中撫杯
叙綢繆攬鬚感霜蓬嗟哉南海濶息老垂天鵬叶亢志
墮迂遠末路迷英雄兩耳醉發熱浩蕩傾心胃懷策六

十年不肯委無庸憂時切空言嫉邪改欣容不平首民
政次第及兵戎萬理酌得失萬事區私公四座寂不譁
但聽聲鳴鐘白衣照山林竊比廊廟功誰能述成編藏
於山之空後人知子雲其道亦不窮勸君再飲酒長嘯
延天風

速楊君謙石田記

山中有白石廣衍得數畝堅瘠不可耕無用實類某朋
從從加稱遂爲石田叟稱者非譽辭吾亦甘其受楊子

許爲記其言食已久往往人家見篇篇燦星斗一見一
熱中意子獨我負札劍表心許何況曾出口得非以陋
物不足辱錄取碑有紀封禪鼓有示獵狩於此逆觀文
或可假石壽子文侔漢史其傳信無朽脫使不多作難
保歲月後恃子猶洪鐘應隨大小扣不應似生吝吝生
虧所厚吾石能作言將以子歸咎不聞詩所載草木備
羣醜不信石終遺不遭點金手遑遑日翹佇拜嘉亦當
有

寄錢允言

雖是經年別尋常見好詩湖南與湖北相望即相思楊柳青霞館芙蓉碧玉池乾坤知佚老微詠間清卮

寄桑通判

驅馳一倅厭爲州歸就高閒未白頭竹篋理詩春草亂糟牀聽酒夜泉流農桑舊課今家事山水清談昔宦遊因愛兩湖風月好近時知買木蘭舟

奉寄大冢宰三原王公

喜見溫公載相時衷心如日鬢如絲謙辭高爵身稱老
優免常朝帝曰私瞰鬼樓臺無地起質神章疏有天知
酌量氣化人瞻斗平準安危國倚著富焜煌看玉帶
功名登載託金彝超賢拔俊休遺力扶植昇平此是基
戲人短視

朱子阿堵中光晦視昏沈祇坐醉翁短初非五色淫只
消理肝木未須刮篋金睇遠野常霧瞻晴天久陰逢人
昧真面而從言語尋欲比亢倉子誤名觀世音其疾止

耗馬豈廢輦與瘖體具聊乖用譬如不調琴一向甘憎
懂青白非所仕把卷曉著字具服倒捉衿對酒妄告止
既灑徒拒斟出門皆通衢長迷蒼耳林平生絕騎馬惴
惴在臨深尚有能爲者千首日細吟我知子不悔其明
在諸心

懷張允成表弟

歎歲逋租力莫償一家十口趨流亡小兒膽大輕官事
老者年衰重故鄉落穽西風何處迹啼蜚寒雨幾迴腸

封書欲寄愁難達空倚江干數雁行

文宗儒在告

功名大慾淵取之無一足朝廷曷忌吝賢達豈盡祿投
林先機鳥清晝託昏宿親知言早計風雨顧茆屋關門
待白髮歲月在松竹逍遙風塵表昨夢破榮辱尚有舊
藏書坐課諸子讀

金陵約史明古不至

仙舟望不到玄都近信虛傳過太湖如此江山空舊約

可勝風雨有長途燈前白髮暮聲在地上碧桃花事無
春已闌珊人尚遠幽禽何苦換提壺

賀劉德賢冠帶

富貴侵人五十三烏紗頭上忽巖巖館甥上壽裝新帶
鄉友通書署散銜諠竹滿堂鶯宛宛飛花撲酒燕喃喃
嗟予白髮巾都折燕賀深盃到老饒

贈范希敏

膂力衰來背橐駝只於鄰並嬾經過算年已覺同生少

畏死頻嗟去日多
螺贏螟蛉假親戚
烏鳶螻蛄後干戈
于今丁役都無累
輒飽三盃或自歌

贈都良玉

鄉里同生壽及耆
少年筆硯復同師
丹山碧水行歌地
春暖秋涼醉飽時
樂在太平須要饗
事於分外莫求知
放舟今日西谿上
不問衰強比白髭

慰人受侮

先生無喜亦無嗔
默默熙熙滿抱春
已辨恕心何忤物

儘能虛已自容人臥憑高枕欺江雨醉把深盃納世塵
向晚不知花在地開門一笑墮頭巾

謝庭新秀詠芝祝西厓先生生子

南岳昭奇產明時迹亦超地成靈宿孕天與福何徵名
重易堯識貞非草木祇文敷華蓋殿柄用紫宸朝衍玉
家承慶高霞代作標仁支耆禪續和氣屬薰陶徵桂思
燕竇如冀應帝堯按圖他日事祝願且歌謠

奉寄王冢宰

萬事浮雲在目前先生拂袖似神仙餘畱後祿宜諸子

分付高年屬老天亦有邵窩容說講公退歸設講西園曾無范

契盡還田公以子買田十畝盡令贖去滿腔樂地春如海元愷中間

第一賢

聞楊君謙致政賦此以致健美十五首

當場拂袖便南行一著孤高更覺清初擬熱官移教授
思量猶自累瓢聲

春官司署儘能閒猶道勞形與病關身在早朝霜馬上

青青殘夢是吳山

江南微雨杏花春
一箇漁舟載病身
莫信歸來亦無用
釣竿斜日弄絲綸

功名出處異於人
染指初頭便乞身
人自誚渠渠自足
了官歸奉黑頭親

神武高冠掛急流
老人之事少年謀
江南四百八十寺
處處磨碑待記遊

到手功名賦子虛
深山長谷覓安居
讀書已足功名事

更讀人間未讀書

文章的作大家傳萬變風雲筆有權要覓大山藏小史
東華香土斷無緣

茫茫仕隱不同風進退惟人自折衷雁宕村前梅雨裏
低頭畦菜是英雄

秋空歸鶴楚雲高白晳青山白苧袍多少玉堂金馬客
待抽身得已霜毛

乞閒不與少年宜領得天恩又較遲忙要著書容補世

君王會有詔行時

新製銀盃興亦豪判將榮辱付陶陶
春風觀樹軒前酒不醉玄都觀裏桃

都門祖帳百花飛多見龍鍾賦式微
較取柳條千萬折不曾送一少年歸

臨歧冠蓋酒淋漓卷軸通朝滿贈詩
當是別翻常案子十人描畫一人歸

寤在鐘鳴漏盡前恩波特縱五湖船
君王自要成廉退

陳乞原非例引年

碧山勾引步如飛
少日知閒古亦稀
只有馮良年頗似
又非曾慥督郵歸

寄王尚文大參

逢人每每問康寧
地遠何由一寄聲
仕已無心聊翫世
棲遲有宅尚依京
柳邊細水閒臨鶴
花下深盃獨送鶯
似此逍遙知不老
百年詩酒是長生

與王優

高歌宛轉送新聲
腔愛頻移酒漫傾
著水遊絲風趁起
過牆花影月扶行
正須陶寫當吾老
更爲慙慙奈爾情
可惜相逢牡丹後
柳邊聊倩答鶯聲

喜吳吉甫及第

吉甫吉甫羈孤子
乾坤浮生漫無止
髯鬚饑渴誰與謀
黃金陵前哭親死
破褐猶知裹父書
借讀空山月中字
江邊古寺夜摸碑
心記舌翻朝若水
聰明過人道豈窮
天將與泰先之否
甲子高科談笑間
亦有神人開夢語

當今天子聖且明賢俊乘時思崛起搏風希鳥天九萬
試足神駒日千里老翁患難窮苟活且頓頓憂爲君喜
君不見人間貧賤富貴基范相蘇卿乃如此

贈沈以節

粉奩塵滿硯池枯且欸清談事酒壺好客諸侯何處有
通財知己近時無芭蕉夜雪闌新興蛺蝶春風卷舊圖
念我平生釣竿手扁舟特爲寫江湖

蜀道兵興聞徐遵誨往尋舊業

烽火西川萬里餘，扁舟此別意何如。
衰遲自可加餐飯，離亂無由數寄書。
江上羈愁衣帶緩，鏡中勲業髭毛疎。
秋來無那多風雨，遙憶成都舊草廬。

贈海上劉將軍

少年儒將有高名，說劍談經四座傾。
久處幕賓能草檄，舊隨童子盡知兵。
月連夜火沙邊堠，潮挾秋茄海上城。
聞說遠人歸聖化，欲銷金甲事春耕。

奉和陶庵世父留題有竹別業韻六首

舊宅西來無一里別成農屋傍長川真堪習靜如方外
雖可爲家尚客邊賃地旋添栽林壑鑿池新瀉漚麻泉
北牕最愛虞山色也似香爐生紫煙

散髮休休依灌木洗心默默對清川一春富貴山花裏
終日笙歌野鳥邊聊可幽居除風雨還勞長者訪林泉
留題尚在庭前竹淡墨淋漓帶碧煙

糲飯簾衣常自足猶勝杜甫客西川老妻課佛清齋裏
幼女鳴機夜火邊幾樹涼雲散高葉一溪明月瀉寒泉

寂寥草座無人伴自起添香看篆煙

人愛吾廬吾亦愛秋原風物帶晴川蘭甘幽約宜堦下
竹助清虛要水邊只好蔭茅同背郭何須蓄石慕平泉
苦吟自覺多新病華髮時籠煮藥煙

比屋千竿見高竹當門一曲抱清川鷗羣浩蕩飛江表
鼠輩縱橫到枕邊弱有添丁堪應戶勤無阿對可知泉
春來有喜將于耜自作朝雲與暮煙

鶴毛鹿跡長交路荇葉蘋花亦滿川
炙背每臨簷日底

曲肱時臥樹陰邊一區綠草半區荳屋上青山屋下泉
如此風光貧亦樂不嫌幽僻少人煙

慰吳水部德徵喪子

水部先生哭仲兒深情未盡六篇詩涕洟苦苦成何益
魂氣茫茫無不之滄海沉珠家失寶崑山借玉手書碑
蘭芽在眼春仍好老力栽培發有時

和徐伯仁抱膝偶成韻

皂弄仙居未易尋惟聞抱膝有長吟人遐杜曲天仍近

徑捷終南地不深
閒漫安排種瓜事
老徒激切佩蘭心
秋涼春暖悠然處
風滿高懷月滿襟

羊亡已後不須尋
妙語時時對酒吟
江海浮沉鷗跡遠
山林縹緲鳳巢深
天違功用金誰礪
道合行藏玉汝心
十里相思各南北
一春風雨入離襟

聞謝閣老休致過蘇遙寄

五十懸車事異常
符階綸閣迥天光
千秋國是黃金鑑
一夜鄉心綠野堂
漫賦祁招惟自止
舊圖負展敢云忘

金
卷七
拔風後起梧桐樹四海還瞻老鳳凰

鵲打雉贈陶將軍

猿臂將軍臂黃鵲小隊蒐原笳鼓急驅叢迫薄草木驚
野雉衝人馬前突漆眸側睇奮脫鈎控拳捩翅筋力適
雉欲逋飛膽先落犀爪攫顱如就縛晉人唱采和千聲
將軍厭鵲自摘生剗心剔肝錦毛破五色花袍腥血浣
題號

耕樂

良家無外慕躬耕修隱德庚庚東西畝宜禾更宜麥迹
勞不自悔志靜乃云適茨茅荆溪許清幽多水石西挹
銅官秀右匯太湖碧林春鳥雀鳴鄰並戒作息和風拂
田穉蕊蕊行復粒兒孫候歸來竹戶燈火夕引觴漫沾
醉偃息就北壁所得還自賀不敢忘帝力

宜閒

丘壑年來寄隱踪安眠飽食養龍鍾日由僮僕知生事
家信兒孫理戶傭題句園林選修竹盼柯庭院愛孤松

白頭多少忘歸客
雪佩霜珂老未慵

靜處

坐對南山日自長
且將一靜掃浮忙
身安嬾出誰能遣
門設常關亦不妨
秋水止潭心共靜
寒梅隔屋鼻參香
未知乍暖初涼候
可有閒踪下草堂

鈍齋

高懷已足見平生
利器如何假鈍名
事不爭先讓人做
心無著急信天成
夔憐躑躅寧忘步
鼃跛蹢躅亦有程

如此遲遲吾自得青松看取雪中榮

宜閒

黃塵不是海特地爲人深浮世有窮日勞生無止心從
容一樽酒消散五絃琴會得其中趣悠悠萬慮沉

且閒

十載飛塵雙足黃誰知屋裡有滄浪靜時覺得忙時錯
一日還如兩日長行遇好山須命酒坐因芳樹便移牀
白頭短杖南塘路我欲來談華子岡

遺齋

風雲已外違高翮草莽之中寄賤名江海固非長往地
乾坤聊寄不訾生烏羅禮廢人將老白醴恭衰我自平
菜本瓜苗雖瑣瑣栽培於物尚多情

蝸殼爲史廷直題

不知小隱計如何蠻觸無爭所樂多身外乾坤等虛殼
窟中風月是行窩長牋舊稿詩黏壁癡筆新圖墨滿螺
想得盤旋似盤谷白雲春夢有仙婆

廷直有姬號
白雲道人

自寬

縛齋如斗白茅茨安僅容身小不卑瞰鬼樓臺隣舍得
藏蝸天地自家宜門前塵海一簾隔座上山圖萬里思
居漏老夫求不媿與君談道有來期

守庄

十角黃牛五母雞知君舊業在雙溪寄人詩簡秋裁竹
教子書燈夜照藜四畔無爭田井井百夫戮力黍萋萋
却憐杜甫頻移宅才住瀼東又瀼西

拙齋

靜者齋居惟抱拙機心機事笑人忙讓他好手誇修鳳
顧世多岐敢問羊逕草不除門自僻林巢可掇鳥相忘
老子亦是無能者築圃何妨住隔牆

逸菴

逸迹離城市分居雁鷺沙屋中人嬾散門外樹橫斜名
漏山公啓鄉當虞仲家梳頭下白雪把釣著烏紗風信
北牕取月從東海賒交僧會櫻笋兒子托桑麻醉坐自

橫管春遊或命車
鷓鴣安野竹
蛺蝶選林花
觀我還觀物
其生豈有涯

竹牕

有竹之家亦有牕
無人領竹竹難降
涼櫺却暑風
千挺碧扇推秋月
一雙夢入籟聲方
倚枕酒參葉色漫
開缸知君神觀清
於玉獨自脩然詩
滿腔

月航

兩頭簫鼓遊明月
滌此清光拉柁開
信我船中都載却

從何水上又浮來南飛鳥鵲驚鳴榜旁躍魚龍觸洗杯
敗興笑他十里雪有人空去復空回

聽竹

城市豈堪聞瀟湘寄耳根此君如有語靜者在高軒
靈玉自成韻清風不是諠心通正如洗明月滿秋園

可菊

東籬不可桃與李只可秋來有菊枝要我將詩收爛熳
勸君澆酒放淋漓平生金玉期成汝滿把芳香欲寄誰

九日簪華白頭上風流何減少年時

愛鷗

平生結好惟鷗鳥彼此能閒兩不猜
白日一沙秋夢穩
碧江千里雪痕開憑誰作色因高舉
信我忘機復下來
人欲相尋舊盟處釣竿新水夕陽臺

夢鶴

聽鶴仙人騎鶴去後人思鶴已冥冥
九臯音響尚在夢
百世子孫還姓丁露枕觸心秋欲警
月軒滋淚夜初醒

周公誰謂吾不復瘦影依稀風滿庭

聽玉

竹謂青琅玕其體本虛靜風來假之鳴因聲乃生聽琮
琤復琳琅環珮滿三徑冥心齋中士聲耳兩相競緣聲
知風端緣風知竹病要知竹有音不待風命令簫竽發
天和中律雅而正

心耕

問心何可耕其地方寸耳何足展東作所劄當何似我

試忖度之固非沮溺比曾莫事於鐵秉茲靈虛耜搢搢
駕仁義役役闢詩禮多讓豈失段不舍亦猶仕積久驗
其成孝悌是糜芑象賢各穎秀無復有糠粃生生世所
業子孫孫而子奢哉讓田者所得安敢擬

醉雲

長醉無醒日有似雲冥迷正賴無心公爛倒同如泥雲
醉兩相忘渾渾抱天倪世上不飲者不能與物齊只可
自怡悅勿諭劉伶妻



市隱

莫言嘉遯獨終南，即此城中住亦甘。
浩蕩缺門心自靜

滑稽翫世估，仍堪壺公溷。世無人識周令移，文好自慚
酷愛林泉圖上見。生嫌官府酒邊談，經車過馬常無數。
掃地焚香日載三，市脯不都供座客。戶傭還喜走丁男，
簷頭沐髮風初到。樓角攤書月半含，蝸壁雨深留篆省。
燕巢春暖忌僮探，時來卜肆聽論易。偶見隣家問養蠶，
爲報山公休薦達。只今雙髻已毵毵。

湖南

湖南盡是君家物
今代風流賀李真
青草扁舟落吾手
白鷗萬里屬何人
玻瓈倒見波心月
翡翠平開雨裡春
我唱竹枝三十首
明朝相約伴垂綸

橋東

橋東未與東橋異
問訊何勞錦里翁
翦取竹竿漁具足
撥開荷葉酒船通
獨臨秋水人搖月
漫送清歌樹引風
常笑西隣憂不足
白頭心事竟誰同

聽泉

若人居城市以耳求聽泉泉不在城中
山中乃涓涓終日未忘聽豈在耳根邊
若以實境求此泉隔天淵要知泉在心
心遠地則偏所謂希聲者無聽亦泠然

守溪

愛是雙溪故居好百年遺澤與人俱
保雌大覺聃翁勝改姓直嫌柳子愚
舊有一隈魚十頃新招六逸竹千株
買書教子非無益菱角雞頭總入租

西園

爲園多半是遊嬉傍宅西偏事事宜
條尾趁花溪宛轉鶯聲隔葉樹參差
地循五畝橫分畛路遠三叉曲作籬
滿面夕陽人已醉還歌飛蓋舊遊詩

樂野

近習農功遠市譁一莊沙水別爲家
牆凹因避隣居竹圃熟多分路客瓜
白日簾櫳又新燕綠陰門戶儘慈鴉
我當數過非生者酒滿牀頭不待賒

月谿

月爲大家物何獨此谿有千谿千谿月同光無薄厚惟
是谿上人雅與月相偶君於此谿外他月能識否逍遙
見在境此月隨所取叶低頭弄清華白璧落我手尚呼
酒酌之谿月我三友

清谿小隱

結廬城郭遠靜勝此谿邊鷗鷺分家住烟波入夢眠釣
魚償酒券賣藕補傭錢只隔斜陽岸經遊須倩船

春江

愛殺春江日夜流
有人結屋住江頭
門前釣石臨黃鶴
牀下魚波洗白鷗
未識何年變春酒
且將吾道付滄洲
天光月色溶溶地
更好憑虛著小樓

松谷

幽尋僂地漫托隱
飽啖神苓差勝葦
樹老與人千歲得
山空無物兩崖分
靜知夜半傳清籟
虛愛春深納白雲
掃却鳴騶不容迹
日長惟有鶴爲羣

西川二首

移家忽要離川東自信何須問卜翁
七水大都如屋下一山小半入城中
沙鮮近市拌多蛤海氣通村井或虹
有片閒心無所作畫圖詩律兩爭工

西川風物新家處一畝之居半畝苔
慮怕市喧忙避去便宜山近特移來
芙蓉曲渚秋風動雁鷺長波夕照開
我亦曾尋偏記得隔林高有古書臺

竹鶴爲道士作

道人種竹復養鶴鶴可看家竹護壇仙驥往來天上下
玉枝消息日平安風前掃葉碧雲亂月下鳴秋白露寒
物外閒緣消不盡墮毛裁毫穉裁冠

野鶴爲地師作

野鶴自得相白衣玄作裳竦身週宇宙舉首見圓方赤
縣非凡地丹丘不死鄉人間好山水歲月與誰長

茶坡爲劉長憲世熙作

使君嗜茶如嗜酒渴肺沃須斛二斗官清無錢致團鳳

有力自栽春五畝輕雷震地抽綠芽行歌試采香慚手
世間口腹多累人日給時需喜家有還道通靈可入仙
非惟却病仍資壽籠烟紗帽躬執爨活火何堪托輿走
題詩戲問滋味餘得似王濛及人否

香谷

惟蘭生谷中谷香自蘭生如鄉處君子遂稱君子鄉經
云香界者因香界亦香願言固根抵雨露發天芳勿隨
茅所化歲久安其常

尚古

此心何慕慕先賢不與時流作世緣
天地忘機推華子
詩書有道閱堯年
深衣大帶人如玉
喬樹高雲宅似仙
聞說虛堂閒素壁
一圖太極日長懸

題吳子潤育齋卷

落地爲男子思以成厥德
蒙象古有訓作善固可則
念生敢忘養務學必求益
詩書在長勤仁義服無斁
欲造君子地涵濡匪朝夕
雨至無槁苗樂至無畱疾
舉措先

所存終身蔑差忒

古山

人事有動靜青山無古今
高秋落手板雅調合吾琴
風雨付外物煙霞凝道心
茫茫天壤內仁者是知音

雪樵題金山僧惠鎧

大江一箇黃金山大雪漫山變
白玉山中琪樹斫作薪
塞破寒窰十萬束屋中凍衲四大縮
燒之不能溫手足
却燒十日化爲水開門一笑春江綠

竹菴爲毛太守題

卓立曾知抱節君百年根柢渭川分羣居族屬不易地
美質子孫皆有文移榻清臨冰簟月積書涼護玉籤雲
搖環振珮琳琅處未許人間俗耳聞

空舟爲寶林寺僧題

齋舫曾聞六一翁僧居臨水與舟同指舟爲屋身浮世
假屋名舟心太空就地掃雲天影上開門見月浪痕中
我來把筆閒題壁白髮冷然兩鬢風

曉牕爲明上人賦

一個山窗漏幻塵
櫺櫺白映紙痕新
豈無夜半聞鐘者
猶有天明做夢人
自閭閻中勞摸索
到堂堂處弄精神
我今更與作轉語
推去關來總任真

菜菴

嗜淡原非食肉侯
圃翁種此托珍羞
霜根下筯兼糜爛
雨葉堆盤薦齒柔
買去固多求益者
拔來應少爲人謀
世間至味君何識
三九常充日不憂

梅菴僧號

老僧開箇歲寒坊百樹梅花萬玉行
色落空門空是色香成妙果妙聞香
人無入處雲遮路夜不關牕月到牀
他日大方參了義碎中求核也須忙

南洲爲華中天題

湖水中央地可農龜蒙遊處有遺踪
沙坪接畛田千畝玉溆通橋路幾重
凭雨闌干開荷葉跨波亭館夾芙蓉
開門便有陽光入曝背觀書好過冬

東滄

卜居東住鳳麟洲四面玻璃覺屋浮日出不知天在水
海空還借地爲州鯨風拂釣珊瑚檻蜃月開簾翡翠樓
閒與尊翁紀年歲石堂曾下幾莖籌

謝答

謝頂郎中文祥寄筍脯

浙雨溢山藪竹萌密無地土人饕頓頓腸胃當厭飫吾
蘇少其祖數竿破俗藝有茁重兒孫豈敢屑盤筋知味

聊耳耳僅免煮箐茹愛我愛日翁脯腊富裏寄蒸爇得
火候法熟野衲治新鮮色莫黯纂纂玉縷脆烘日不過
燂著鹽未多清嘗之清可珍吃棒元脩避余生本骨立
滋瘦忘所忌客佳稍出供薦茗聊三四還笑湖州饒不
管傷幼稚聞君苦痰疾日食不妨嗜豎氏曾有說性可
消膈滯能分固知羨推食感念至

答明公送椿芽

山僧藜藿腸采拾窮野味靈芽漆園種新摘帶雨氣鹽

蒸嫩綠愁日曝微紺瘁裏紙聊搯許珍重不多遺仍傳
所食法且囑要精試兼烹必雙井水亦惠山二及云性
益壽甫與昌陽比香甜流齒頰食過發吁噉山僧苦薄
相折此八十計本昧吾儒言方長仁者忌

夢謝人授鹿角膠莫記全篇寤而足此

毛龍頂上紅茸茁三尺珊瑚長仙藥根貫神顙不可折
扣中五音發清越農皇笑以金刀截骨解支分寸成節
湘以玄水桑火熟七日鼎中緘鬼血天精地髓轉作雪

補我玉堂溫不熱試之匕許膏吻舌酥飴停調氣馥烈
便爾小活亦大耄更三千年等一瞥

謝程萇墩贈龍尾硯

萇墩品硯歛居右雅稱先生翰墨手先生與硯俱歛產
眉子羅紋富誇有櫝中種種自懷玉能割一愛到石叟
自嫌隅處小有病臨出摩挲要難授我云先生豈無藥
庸賁一銘如砭灸輒然捉筆從背書石上煌煌麗星斗
頭巾折角以人傳此硯因銘名亦久尚憐龍尾是奇材

東坡何以嘲牛後

謝宋承奉惠壽木

鄙夫今年逾七旬無一用世人嫌嗔讀書不成愚固在
耕田無收家益貧小兒造化苦翫弄浩蕩自謂無懷民
何愁白髮不相放生死已譬晝夜循花前笑口幾迴酒
松下無言終古塵也憐狗馬有帷蓋安少一木藏吾身
堂堂七尺我自玉烏鳶螻螳誰敢親青城古杉一千歲
天將爲我畱輪囷宋公借力翦寄遠鯨波萬里來猶神

質如金石堅可珍其文糾紐膩且勻霞肪暈紫香觸手
昇入草堂驚四隣自公好施發天性豈以菲薄當其仁
鹿皮蒼壁殊未稱短篇聊訴吾爲人

謝孫世節惠藜杖

孫子憫老蹇惠杖若無杖其輕猶握烟且喜不壓掌七
尺多臃腫論重僅銖兩促節數三十還復有一長敢以
照書燃獨任探梅往暑雨地沮洳出遠步堪強非惟借
便健顛躓有所仗何以謝記存小簡附拙響

葛惟善嘗托人求虎跑泉詩附贈潘谷墨銅雀硯
墨既不至硯亦云碎因謝此

慚愧高懷記項斯開緘空感十年私墨亡潘谷烟澌外
硯破銅臺瓦裂時馬德未忘十里惠虎泉終補一篇詩
何當握手吳門笑共付浮沉與不知

謝友人定正小詩數字

手折朱批笑滿腮看加簣土即崔巍妙辭信自我傳去

後日安知子定來

王儉云後世誰知子定吾文

秋樹映星疎米出夜

江容月遠波開古人高誼相成處風字千年重釣臺

和計常熟惟中虞山雅集

縣事頗清暇山椒成雅遊羣彥畢追隨君子信徽猷林
構級石登沿澗俯清流燕賞屬邦君名勝況古州連峯
橫秀野重湖映清秋環列週郭郭棊錯衍田疇騁目念
遠人鴻迹限南陬貴賤何忘分華篇承遠投宛宛粲白
雪高妙誠寡酬想當豪吟際鮮飈激岑樓繼火延落景
馮欄攀斗牛興懷恥不及烟浪空長洲

雨中過野翁莊訪彥清施先生不遇書此以寄

野翁新築此山莊
石子迴堦引石梁
滿地濕雲封壽塢
隔牆高樹比僧坊
掃苔容我來題壁
刻竹煩君補和章
信與輞川風致合
老須裴廸共壺觴

與施北野小叙僧寓

分曠屢年歲造次
臨客途驀然對面
疑熟視各驚呼招
邀叙僧寓草具聊
市沽伸情發謬語
紀興復小圖人生
類雪鴻踪跡不可
拘惜會仍惜別蕭
然俱白鬚

謝計桃源惠孔雀斃于途以尾至

珍禽籠萬里未見意先叨飲啄違塵目文章剩俊毫重
須論馬首輕敢喻鷺毛餘采賢郎得留形上繡袍

答汪竹坡暑中問疾

跬步蓬門出未能秋來病骨轉峻嶒儘多年紀壽自足
無好兒孫福不應藥物殘生隨楚老菜餽終日類齋僧
惡懷酷暑何排遣遠水孤舟藉友朋

送歲歌謝宗道士鼓板

打漁鼓唱道情說生說死說功名唱道情打漁鼓說神
說仙說今古仙家自有山中樂凡家自有世間憂年頭
年尾憂不休今夜又當年尾頭唱要高鼓要急主勸賓
酬忘拜揖蠟花燦燦白壁光酒波濯濯青袍濕客莫言
辭主須醉多情送年恐不及年送去還復來漁鼓聲中
白髮催白髮不可變莫放掌中盃鼓磬逢杯絡繹不知
東方之既白舊年已盡客亦散門前又接新年客新年
別唱賀新郎送舊迎新漁鼓忙

送別

送袁德淳還太平

閭門送別當新暑綠波芳草如南浦
袁侯玉雪照離尊言貌溫恭心獨古
誰道今時無古人眼中之人仲山甫
天球河圖東序物置之市肆豈其所
太平作縣草創初務在民安心獨苦
誠格山川及鬼神愛存父母無官府
況於朋友急爲義援我親喪離淺土
臨岐感激一何深默默捫心淚如雨

與張東海別

順便南安路朱藩刺史舟相逢驚白髮未到說黃州細
雨傳盃落浮雲傍席流臨歧更揮翰不復有離憂

別友

青天一明月白髮兩扁舟各舟載一月遂生離別愁明
月解隨人人去月不留豈月管送行今古長悠悠道路
東復西行人幾時休一月亦多忙千方相應酬舉手謝
明月浩歌過吳洲

送程宮諭

因久雨爲言
者濫及去位

車馬出春明雨中人獨行人從今日去雨是幾時晴靜
閣一杯酒亂聞千樹鶯故山堪註易天意就先生

送韓克贊

兩月衾裯厭久眠荷君惠問每牀前頻煩藥物酬多病
鄭重舟航動老年落木門牆秋水宅亂山城郭夕陽船
扶筇起送迢迢目攬結餘情更小篇

送程少詹赴召

奉袂當春雨春風又賜環行藏吾道重寵辱此心閒六
月騫鵬息三年去鳳還宮詹循故秩陞棘認先班求舊
從人望相懽動聖顏拜知髯拂地舞應口呼山撫已文
章在重修袞闕間

送都元敬赴史西村家塾

黃溪雪後爛生光童冠迎船青佩長客子能行秘書監
東家好是鄭公鄉春帷開講禽魚動夜觀鳴絃水月蒼
賓主閒時還倡和吳江滿地綠新章

和文太僕宗儒留別韻

人生一離合中奈歲月邁青春與白髮祇好增咤喟君
子務久要迹曠心匪懈請喻江中水澹泊味長在茲辰
風雨橫來鷁鈍莫快童子認舊德殷勤潔塵解雨亦通
人情收脚漸微洒顧我有老母將筐復加拜展燭話夙
昔勝與生客對佐酒無兼味情留日須載雲天看君遠
林壑信我晦清懽滿在眼萬事不須嘅

別李昭

秋深四日江村雨阻得行舟不得行燒燭添多夜牕語
似天教雨作人情

送都元敬赴試

新科拔隱淪蓬藿不勝春經術必用世山林還有人九
苞省舉鳳三浪促潛鱗仙桂几千樹扳花要認真

和天全翁留別錢氏祖席

謝傳其如不起何畫船詩酒宴遊多人家兩岸聞蕭鼓
魚鳥中流識笑歌細雨沾衣紫舊纜春風入面醒微酡

夕陽更好東歸路
草樹迢迢擁幔坡

送遠行

行矣去君側去去那復畱
會面諒已難徘徊滋隱憂
五里臨清川十里陟崇丘
轉盼路何迫馳心同水流
朔風白日暮瘡馬局遠步
思君隔浮雲豈知我中露
流景不我與客髻已非故
酌彼青兕觥聊以慰末路

送諸立夫歸錢塘

昔年記買臨安船
來與泉石修清緣
劉郎史伯及吾弟

一船四客如登仙諸君作我南道主湖山笑引肩輿前
談詩酌酒夜不輟吻焦目澁無安眠別來人事等雲變
舊遊一夢驚三年劉郎化鶴招不得吾弟掩玉仍黃泉
感懷夙昔有零淚掩卷怕看登臨篇殷勤對話雜悲喜
買酒取醉愁無錢空齋停火照寒鼠古木翳寺號饑鳶
明朝何苦又分手拂衣長路開風煙朱顏白髮倏忽事
人生離合真堪憐

送周桐村

白髮烏紗將八十文章談笑見楊雄
風流不減三年別未許尊前稱阿翁

看到梅花十萬株清吟一月住姑蘇
城中屏障都題遍施與吳人百斛珠

送汪廷器重遊遼陽

三韓亘東北其地次海隅勢位何崇高
沙漠蓁莽俱盤鬱千萬山望有醫巫閭
夷夏相交際烽塵稱畏途汪君江南產
好遊司馬徒走馬日千里寶鞭揚珊瑚
風霜切

貂裘酒薄不足呼腰下秋水劍復繫玉轆轤海鷗落長
雲檠桑戲強弧於此顧有樂結納多文儒黃金日繞身
大餅擲歌姝歌姝且不惜巨萬酬邊需磊落見襟抱中
可開江湖一別倏十年玉雪猶偉軀言復尋舊逕去
難色無笑我裹足人牖下祇白鬚分手各有贈贈我錦
韞瑜我亦聊菲薄短篇侑雙壺

用清虛堂韻送匏菴少宰服闋還京

三年袍幘違風沙歸家讀禮如退衙長髯已間數莖白

矐眊明察無纖花鄉人廿載曠接見老少瞻拜常填家
怡然不煩亦不拒正猶茂木容羣鴉朝廷眷注特虛要
匪直鑒藻兼辭葩要儀百辟重德度如鬱須酒渴乃茶
駢駢四牡不可緩我亦殷勤當執撾與君一別絕聊賴
蟻蝨頗學嵇康爬衰人載見恐無日未免握手成吁嗟
時勤相憶但搔首仰睇天上空雲霞

送張廷儀

楊梅墮地連日雨江上喚舟舟不來黃帽唱歌今撥棹

青天白日眼俱開

送蘇安道赴祝冬官惟貞館

江程何悠悠汎汎江上舟載彼圖與書言往海上遊東
海有君子孝友天德優好爵弗久縻岷岵重遠憂歸來
壽春酒酒影照白頭怡怡家庭間和氣聞遠州之子固
欣從芝蘭味相投匪特自假益尚應童蒙求春風動花
柳絃誦溪堂幽可睇不可即含情渺長洲

送薛堯卿漫遊言登泰山謁孔林而迤邐求仙海

上

堯卿掉頭狂且忙，結束東遊如子長。
擬將足跡試天下，三月已自儲餼糧。
出門長嘯振林木，蒯緱短劍秋風涼。
臨歧調我老不及，登高健步如飛翔。
岱宗未到已在眼，齊魯指點青微茫。
書生浩氣久憤激，要倚日觀攀扶桑。
秦鐫漢刻多漫漶，且莫苦苦求其章。
東封何有許功德，文武未必能張皇。
惜哉君行差較晚，燼後灑淚悲靈光。
是年閏里災，素王有道自六籍。
固是不死之仙鄉，羽人丹丘。

何足問勿以汗漫窮荒唐丈夫汲汲在事業白髮須臾
成老蒼無人薦達自陳列朝廷求賢正無方頗聞北事
近擾擾毛錐未抵丈八鎗邊頭合有班定遠天下豈無
張子房山東李白恃必用莫自兩生追所亡不然歸來
且高臥共喫飽飯歌陶唐

送周文襄公乃孫廷器以畫像驗塑還吉水

土田亘江東揆賦億兆計其多由寸八所在敢遺地太
祖太宗時稽斂或未備侍收信長屬饗公餒私費習久

遂玩刑忘身殉于利捕逮八百萬空牘勞記註歲餉常
不及日究常不治文襄應簡命安濟受斯寄公知法禦
患法䟽患乃致誨盜在慢藏要駕在失御盡斥宿漁手
令民必躬輸升斗舉在公庾儲復官涖登積充舊典罔
耗有攸裕所羨亦不訾陳因年相次戶庸及公需凡百
資其出于時民樂生朝廷無顧慮幹轉一時機掃蕩滋
深弊如器之玷傾援拯暇不遽草茹謝苛猛振蠹匪斂
聚公薨五十年遺政已莫據後繼亦多賢措設各有異

邇惠不可誣于久乃有祀廟貌欲追惟歲月蔑省記公
姓攜繪影按之求肖似外肖衷未然有愧六二比才局
負心胃仁義具肝肺智諍周聰明力量發意氣不然是
非間耳目替三四我喻操鎗工斯得謂能事工答毋深
求神般不載世我聞發咨嗟時哉則殊勢秋風振江介
白露草木瘁遊子思故鄉懷圖渺西驚往矣不可畱欲
贈言莫既

丘侯休致

浮雲滿眼使君行
山水無輝日未晴
明日相思何處是
甘棠樹下獨聞鶯

江山正有漫漫雪
行客應無緩緩期
越水吳山一十里
輕舟歸去似來時

送吳朝陽都閩之任制司

桃花春水古城濠
僧寓遙煩降節旄
雙鬢相逢慙我老
十年不見覺官高
新篇爛熳牛腰卷
舊酒淋漓獅子袍
南國誼呼迎閩制
千兵夾道擁弓刀

送錢士弘會試

春闈指日忙忙去躡凍開途歲尚餘拂面風塵寒送酒
臨關霜月曉催車膀頭要著渴睡漢闕下當知行秘書
五十功名休謂晚老成還聽首傳臚

送劉國賓

劉郎面玉爭荷花少年經市果滿車金張許史不敢倩
鳳皇合德賓王家平步爲僊五雲裏甲第藏春天尺咫
笙謠催醉金叵羅七十紫鴛扶不起治遊昨日過江東

細馬紅粧山水裏家人要問山水處生綃搦取蘇杭去
送朱性甫遊西湖

西湖我先遊君去落我後落後爲生人先遊託故舊從
君未到時說與亦疑謬當以湖洗眼口亦要湖嗽不嗽
詩不清一洗目不瞽此湖有大量先後皆納受固不爲
君薄亦不爲我厚有客有船載有酒有歌侑雨晴無不
好濃淡兩爭秀落日映四山清波照紅袖此特衆樂耳
君宜出其右尋我舊題處佳句多脫漏正自要君拾一

金方口人卷七
一不可宥想見南屏秋倚爾兩肩瘦人多詩亦多各各
備妍陋湖在詩亦在各各千萬壽日日人去來詩能作
將候如故止祝始禪續而迭奏君吟未必盡山水詩苑
圓君行報山水我老尚堪又

送吳惟謙守叙州

雲司轉階例不卑藩參臬副皆所宜君今出守古夔國
過峽萬里天之涯衆爲君憂君獨喜負利要自盤根施
我知作郡得專政豈是唯唯因人爲叙封況聞廣九邑

其民既遠雜以夷鑿牙穿耳固頑獷撫之恩信當懷來
詩書更欲變侏離文翁之任非君誰荔支初紅五馬到
江山亦爲人增奇山谷老人有笋賦讀賦食笋君還知
苦而有味可喻大歷難作事惟其時

送王抑夫作縣陳留并東許倅施煥伯

與君桑梓陰相望母黨況爲兄弟行我之老母姊君母
少日拜姨今未忘兩家昆季昔數人君我聊存屬餘長
羨君讀書事長勤落手新文合時樣學資浩蕩德華腴

外度舒徐中倜儻我慚白髮血氣衰君喜青雲年力壯
北京初還受銅墨風雪克途神轉王挈家便欲沿牒去
河上敲冰進官舫田園豈是容易別自是縣中官署曠
惟民不可日無教有爵相擔畏人讓北來隨地見饑饉
未必陳留獨無恙不徒口慰要心存莫以繭絲先保障
亦聞陳許間未遠甫有膚菴可醕倡故人所在即故鄉
天涯詩酒生佳況嗟予廢置祇牖下枕書昏眠眼脂漲
升沉由來自有時已信老懷齊得喪尚期諸輩各努力

要在致君堯舜上

送朱武選調常德別駕次李西厓學士韻

恩華浩蕩縱長遊一牒南從楚國投
世事未能容我料風波不足使人愁
漫消惠飯須佳句先說潮陽尚遠舟
廊廟江湖俱宦達天涯持酒看雲流

送夏德樹告疾歸台州

尊翁舊著堂堂節令子連章倔彊名
欲激宰公言過直因忘富貴去偏輕
素知眼淚撰不出豈是髭鬚拂得成

擬古數篇者反覆極於所學見平生

和林郡侯送王敬止赴任瓊州韻

休云寵辱遞相催信自先生直不回
怖鱷莫憑瀧吏說蒸羊好待相公來
乾坤是處皆容物小大無官不適才
早晚春風即吹到海瓊花發必先梅

送王敬止謫瓊州

流行坎止世途中萬事由天天自公
失馬未能知禍福辨烏何必在雌雄
賜環擬望佳山月用楫當歸漲海風

白髮一杯分袂酒相迎還許送時翁

送山陰秦復正謁華光祿

瞰庄賢主得佳賓百里清川映綠蘋
酒榼詩囊塵外物山光水色眼中人
石池俯雨魚苗暖畫閣開簾燕子春
此地持杯如見憶高篇擬寄蠟封新

送梁道夫還瓊州

瓊島迢迢候老翁深懷祇博兩宵同
片帆南浦草仍雨斗酒長亭花又風
話俗燈前南海近思親夢裏北堂空

情知此別難書問止到衡陽已斷鴻

傷悼 送蔡附

挽張東海

只合畱君白玉堂天教醉墨賁南荒
衰毛送老歸來短遺草隨年化後長
幾欲扁舟訴離別竟成清淚作存亡
因尋舊寄聞鵲帖人物傷心墮渺茫

病中挽周桐村

藥物兼旬兀病身輓輒獨後北邙塵
江湖隔眼燈前淚

生死通心夢裏人古誼高懷畱健美適文細字憶精神
他時容展孤墳拜風雨桐村宿草春

悼隣叟

八旬筋力在舉止後生然灌稻畦煙裏撥蔬園雪邊生
無息肩日死有到頭年尚囑諸孫輩成家莫嬾田

挽沈東林廷佐

烏紗天與老爲容白髮知因病未籠西序有攢俄殯雨
東林無樹不悲風酒邊偃僂思遺象詩裡推敲失此翁

獨剩吾家舊題竹一般
瀟灑月明中

挽范老

雙目冥冥與氣沉
有何牽掛子孫心
解驂誰補無從淚
就布聊爲不足衾
破屋秋風茅把盡
孤墳落日水聲深
老奴封土辭歸後
安得松楸作樹林

悼張靜之黃門

先皇深寵死難忘
魂識還依玉案傍
滄海莫知歸有鳥
白雲誰謂去無鄉
念終在子天終吝
世自存詩人自亡

憶得西湖觴咏地，豈勝清淚月微茫。

挽嘉定翟孝子允高

烈火見者畏，不謀天下同。伊人燔廬，菑負母走，焰中臨
難切至情，全愛出至窮。天人斯通，昭尋熄，從返風金軀。
茲銷化孝聞不可終，可恥及泉誓尚爾。歌融融。

挽沈明德二首

青袍落魄衆堪憐，每每科場讓少年。原憲長貧還有病，
淵明一火竟無廬。小篇絕筆留孤邸，半紙虛名付冷壇。

魂憶西湖是歸路梅花月色尚依然

貧圖斗祿老仍驅以醉爲生以醉殂地下酒壚那復有
人間詩鬼不能無千年未信歸遼鳥三匝空憐遶樹雛
寄我詩篇成故物每因開讀便長吁

哭文溫州宗儒

向來作郡夢非祥遠大功名壽未遑造化小兒俄柳肘
乾坤遺愛有桐鄉丈夫氣節存人表老友肝腸剩淚行
還信天公著餘福當家分付寡辭郎

挽程宮詹

高官博學何辭諍頃疾長殂可悼嗟君子不知蠅有惡
惡矢也蠅惡小人安信玉無瑕聖明浩浩湯除網睽極
出昌邑王傳茫茫鬼載車歸把遺文殉深葬看從地下發光華

登小雅堂哭史明古

築臺高住似神仙恰好堂成及巳年歌哭於斯人忽耳
死生無度事茫然青山底處尋遺史白雪從今付絕絃
此夜獨登惟見月清光依舊石闌前

哭劉邦彥二首

五十年來托故知，祇酬兩會便長辭。
湖山好在無人物，風雨空令有涕洟。
松下骨埋宗長鍾，梅邊魂和老逋詩。
瓣香在手身違病，月落斜牕起坐時。

天教行樂住杭州，今日湖船似舊不。
挑怪劉郎來不再，詩憐杜甫死方休。
風流山水仍紅拂，富貴壺觴到白頭。
最是竹東聽雨夜，而今空有夢追遊。

挽璋公

璋老性靈澈參扣不侗版學苦行亦堅心舒語還簡昂
昂如喬松秀色照人眼八旬尚健步有杖倩人撰俄傳
疾不出不意竟絕饌往顧問云何示別作微潛答曰生
我寓死爲生所限限極我何畱何惜復何難舉手道謝
謝言下仍發莞所究亦超然世迹空一剗旋踵即溘然
急若丸走阪此老今已無千輩莫一揀重來但虛堂寒
影照燈殘門前杪樺樹風葉何反反

挽方道士用東坡清虛堂韻

學仙不就如炊沙紫府著爾無閒衙長生苦苦累唇舌
六十瞥眼風中花江湖漂萍本無帶一囊書畫東西家
虛談火龍配水虎豈見白蝠如烏鴉惟於飲酒詫真趣
終身落魄猶蘇葩醉魔作祟病已劇酒莫下咽惟需茶
長途昨夜忽觀化計至空使吾胃撾皮囊敗壞秋草裏
青山劍穴從誰爬碧雲黃鶴渺何許矯首西睇令人嗟
我今隨生亦隨死努力加飯辭飡霞

悲溺

少小出閭右生長紈袴中珂馬越阡陌溢目揚光風青
紫恃富取豈信詩書功調笑隣家姬琉璃爲酒鍾黃金
一朝盡雲衢付冥鴻勲名悲故鏡白髮紛秋蓬淒涼西
華子落魄東郭翁天寒城濠隈失足探蛟龍沉沉泥中
居層冰相蔽蒙家人不得覓尸出汨方融輿歸經舊里
見者歎窮通窮通不必嘆富貴少令終

傷阿同

阿同年十四蓬垢身短小小心効力多過失比衆少每

事解人意指使不顛倒以有成人姿私怪通慧早今年
忽患痘頭面見稍稍週身漸稠密匝肉無空道色白漿
不成識者謂難保愴惶十三朝焦黑如火燎我時去城
中牽念夢屢造同亦盼我歸每問輒悵悞此意要面別
亦自知死兆我歸不見同洒淚傷其天老者正需人何
以堪懷抱今與冥頑處愈自覺同好誤呼尚疑存轉顧
驚悄悄送汝瘞東郊細雨滴青草

蕭蕭東海竹挽吳汝輝

蕭蕭東海竹鬱鬱西山松壤地兩隔越生植莫能同顏
色各相昧音聲或通風精神自冥合宛宛無西東青松
一朝摧此竹抱孤窮以竹書感慨寄去淚亦從

聞陳白沙先生訃

生知祇藉兩詩酬死惜曾無半面由坦坦德從周道往
冥冥心與葛天遊講論語托門人錄封禪書違使者求
萬里白沙何處是獨臨殘月水西樓

堯夫情性林宗行薄世之師天吝之此老不亡名自在

斯文欲鑄我何爲
天長嶺海無從涕
地老臺山有道碑
擬把辦香身莫達
紼前空寄助勞辭

讀吳文定公御祭文

德望文章稱科甲
官階壽考更兼之
嗚呼今日延陵墓
不愧當年有道碑
天子重傷麟喪魯
吳人私幸鳳生岐
白頭野老宜先死
翻向秋風泣所知

挽徐母馬氏

徐家阿母多慈訓
懿德何慚白石刊
針眼未漫衣上綫

膽膏猶膩手中丸
秋陰月掩都房橘
香本霜凋古畹蘭
澱紫山頭埋玉地
賢郎陟著淚汎瀾

送許貞莖

蒿訶引往紼言出郭南門
我來臨其窆衰草淒寒原情
至時掩泣痛惋不能言
百年合有死惜此英妙魂我昔
有女蘿附此長松根
託生相因依綢繆在東崑
長松一朝折脩蔓絕攀援
煢煢委中道有身安用存

挽如公

如老身無著將來典醉鄉號他酒布袋是箇臭皮囊積
禍必自發爲生安可量長眠當不醒殊莫悟存亡

挽周原已醫判

扁舟只近問棲遲玉樹驚非舊見時別後正憂如許瘦
計來已盡此生期世多不學翻膺壽夭莫容官定有兒
頭白老親雖健在封榮那塞喪明悲

挽東禪信公

匝頂霜根七十強笑呵呵地佛心腸掀翻趙老茶公案

踏破林僊酒道場屋掩雲蘿秋榻淨經殘松月夜牕涼
我來借宿今無主還擬呼之在醉鄉

哭金懷用表兄四首

奔波那覺病但見吐車茵一頓可缺食百年無到人何
膏起其死有淚出於親聽雨秋堂夜煢煢剩老身
近哭孟光死傷多病有因不堪衰族裏頓失老成人
生
氣不借穀冥羞空薦蘋橋頭思健步已負野梅春
處世多存厚眼前誰似君老年兄弟行一淚死生分故

宅迷秋水新阡擁暮雲勒碑吾自任未敢謝無文
南畝墊秋水憂懷縈老窮勞生百不足到死一成空身
脆如殘葉病來加朔風昨宵談笑是暫落夢魂中

柳孺人夫坐事身家俱籍入後放歸再造

載造男兒事區區屬婦人時當初涉難產入亦俱身心
絕寒灰後恩回朽木春嗣裡牲豆潔覆奪鵲巢新豈謂
時無政猶聞與亂臣柳門存一脉蔗境脫千辛今已不
可作潛光在翠珉

哭表兄金以賓追及伯氏懷用

秋日哭兄猶涕洟窮冬哭弟又連雨年時大小皆于邁
我輩存亡豈可期昨者笑談今屬夢門人編錄幸存詩
吟踪最憶東橋路青布長巾短杖藜

悼劉協中

先參負文豪喜子紹前志總角弄古辭綽有高遠致雲
敷及泉湧思銳不可摯落筆驚鄉達翔聲聳朝士聰明
累多病冉冉精神弊玉芝折孤莖吳嶽失靈氣前後千

萬年浮生祇暫寄廣大班馬程發軔聊小試奇才固難
生生則天復忌遺章可償壽尚爾不朽恃初怪語不祥
往往寓感喟色慘花當萎鳴悲鳥將逝茫茫脩短數豈
亦容人意不應老鈍夫顧爲英俊淚

挽吳元玉

去年憔悴見京城猶自題詩送我行多酒未能無疾病
一郎何竟了功名祇今孝義存人口更後聲光重墓銘
走拜無因致雙淚千峯落日大江橫

挽屈處誠善寫竹

可菴不可作崑山爲之荒將謂青琅玕一夜遭折傷其
影落屏障千家畱墨光墨以託竹命人短竹自長魂當
附竹存未分人琴亡我來弔風雨秋盡堂空涼含情賦
清篇因之招鳳皇

挽虎丘簡書記

詩折病中身苦吟終損神青山見在世白髮過頭人花
落三泉雨雲荒萬頃春惟餘石上竹消瘦似清真

哭明古回雪中過鴛湖有感

不復見安道歸哉空雪湖
低雲接清淚遠浪激長吁
翫老博士崢嶸偉丈夫
朝廷虛購玉滄海實遺珠
雄辨常翻口衰痕未滿鬚
斯人竟微疾我輩強孱軀
一邑人皆愕三年夢已殊

其子夢人謂汝父六十二當死

妙篇留膾炙還與不

亡俱

挽陳育菴

不見先生系所思
交游何地覓襟期
坐來忽化身無病

傳是成僊我亦疑
剥啄藥瓢偷鶴嘴
絨滕詩草付蛛絲
謠吟舊寄皆珠貝
只恐能飛物亦奇

挽劉芝田

老倦長遊雪滿顛
澄江歸理舊芝田
侯門裏足無名刺
野店扶頭有酒錢
蝨正談天下事
逢蛇忽忌夢中年
孤兒爲問他時計
猶指牀頭捍闔篇

和哭母詩

淚以洩心液中亦
寓邪正媚婦及讒
臣霑巾禍斯興錢

子痛慈親崩衷血隨迸哀極衍餘音悠悠偶成詠仍須
血爲書留之示子姓

經故人墓

故人於此墓石亂水潺潺忙盡剩白骨閒來投碧山雨
崩封未厚地瘠樹猶慳可奈牛羊逐聞之泪一潛

挽韋大年

孝義更文章山林隱德光青春賢者短白髮鄙夫長無
後心不死有琴人併亡潤州如少潤玉樹殞新霜

挽黃節婦

守節難保孤難守節要節完保孤要孤安完節堅心肝
保孤慎飢寒啼飢號寒白屋破死心灰肝清泪酸黃家
之婦李家姜鳳鸞之偶天團團鳳一死鸞乃單鳳有鸞
養子鸞鸞今有文成五色鸞今瞑目已蓋棺地下見鳳
不愧亦不忤手呈高節十丈青琅玕

石田詩選卷七



總校官進士臣胡 榮
校對官中書臣王家賓
謄錄舉人臣楊 鸞